

যুগান্তর

রাবিতে আরও এক শিক্ষককে হত্যার হুমকি

রাবি প্রতিনিধি

রাজশাহী বিশ্ববিদ্যালয়ে আবারও এক শিক্ষককে মোবাইলে হত্যার হুমকি দেয়ার অভিযোগ পাওয়া গেছে। এ ঘটনায় ওই শিক্ষক নিরাপত্তা চেয়ে থানায় জিডি করেছেন। এ নিয়ে এক বছরে ৪২ জন শিক্ষককে হত্যার হুমকি দেয়া হয়েছে। ২৩ এপ্রিল ইংরেজি বিভাগের অধ্যাপক ড. এএফএম রেজাউল করিম সিদ্দিকীকে কুপিয়ে হত্যার পর আবারও হুমকির ঘটনায় শিক্ষকরা চরম আতঙ্কিত হয়ে পড়েছেন।

রোববার বিকাল ৩টার দিকে হুমকি পাওয়া ওই শিক্ষক হলেন লোক প্রশাসন বিভাগের সহকারী অধ্যাপক মো. মাহবুব আলম প্রদীপ। তিনি যুগান্তরকে জানান, বিকালে অপরিচিত নম্বর (+৮১৭৭৪৭৯) থেকে তার মোবাইলে কল আসে। ফোন রিসিভ করতেই অপর প্রান্ত থেকে বলা হয়, 'অনেক বেড়ে গেছিস? তোর জীবন শেষ, জাস্ট ওয়েট কর।' নাম-পরিচয়

■ পৃষ্ঠা ১৯ : কলাম ২

রাবিতে আরও এক শিক্ষককে হত্যার হুমকি

(শেষ পৃষ্ঠার পর)

জানতে চাইলে একই কথার পুনরাবৃত্তি করা হয়। পরে আর কিছু না বলে লাইন কেটে দেয়। মাহবুব আলম বলেন, সম্প্রতি একজন নিরীহ অধ্যাপককে যেভাবে কুপিয়ে হত্যা করা হল, তাতে এ ধরনের হুমকির ঘটনায় আতঙ্কিত না হয়ে উপায় নেই। পরিবারের সবাই শর্কিত হয়ে পড়েছে। আমি বিশ্ববিদ্যালয়ের প্রক্টরকে সঙ্গে সঙ্গে বিষয়টি জানিয়েছি। সন্ধ্যায় নগরীর মতিহার থানায় নিজের এবং পরিবারের নিরাপত্তা চেয়ে সাধারণ ডায়েরি করেছি।

বিশ্ববিদ্যালয়ের প্রক্টর সহযোগী অধ্যাপক মো. মজিবুল হক আজাদ খান বলেন, আমি ওই শিক্ষককে থানায় জিডি করতে

বলেছি। পুলিশকেও আইনানুগ ব্যবস্থা নেয়ার জন্য বলেছি। মতিহার থানার ওসি হুমায়ুন কবীর যুগান্তরকে বলেন, সন্ধ্যার পর থানায় এসে ওই শিক্ষক জিডি করে গেছেন। তার সব রকম নিরাপত্তা দেয়ার চেষ্টা করছে পুলিশ। আর হুমকির বিষয়টি তদন্তসাপেক্ষে ব্যবস্থা নেয়া হবে।

গত এক বছরে এ নিয়ে অন্তত ৪২ জন শিক্ষককে হত্যার হুমকি প্রসঙ্গে রাজশাহী মহানগর পুলিশ কমিশনার মো. শামসুদ্দিন বলেন, শিক্ষকদের হুমকিতে অপরাধীদের ব্যবহৃত নম্বরগুলো ট্র্যাক করার চেষ্টা করে দেখা গেছে, বেশিরভাগ সিমই অনির্ভুক্ত। এজন্য শনাক্ত করা সম্ভব হচ্ছে না। তবে পুলিশ সব ধরনের চেষ্টা করে যাচ্ছে শিক্ষকদের নিরাপত্তা নিশ্চিত করতে।